

Gij Goj Daegcwngz

Daegcwngz dwg bouxhoj ndeu, de gig lingzleih. Miz bi ndeu, de bae ranzbouxkawj gairengz, bouxcawj neix ged caemhcaiq simdoeg, Daegcwngz bae guhhong romh daengz laep, dauqmaz le cij ndaej gwn haeux lw, raemxdang lw ndwi, mbouj dawz Daegcwngz dang vunz. Baenzneix Daegcwngz hozndat dangqmaz, de couh naemj ra seizlawz boizhaemz bouxcawj neix cij ndaej.

Miz ngoenz ndeu, bouxcawj hawj Daegcwngz bae cawx bak duz bit caeuq 5 duz vaiz dauqma. Bouxcawj hawj Daegcwngz cienz le, Daegcwngz couh okdou lo. Daegcwngz doq byaij doq ndaq: “Bouxcawj ged neix, ngoenzneix gou hawj mwngz raen fangz cij baenz.”

Daegcwngz daengz gyang haw, ngoenzneix dwg ngoenzhaw ceiq byai baenzbi, vunzlai baedauq, ndaet-fwdfwd, nauhyied raixcaix. Daegcwngz yawj bae yawj dauq, youzyouz langh-langh, mbouj gaenj bae cawx huq saekdi, doq youz doq eu fwen guh-

angq. Mbwn yaek laep lo, de cij bae cawx gaiq bak duzbit ndeu caeuq gaiq hajvaiz ndeu, aeu mbawrong cumh le oet haeuj ndaw daeh couh dauqbae lo.

Daengz ranz le, bouxcawj hai bak couh ndaq: “Daegcwngz, mwngz vihmaz dauqma baenzneix laep? Bak duz bit ni? 5 duz vaiz youq gyawz?” Daegcwngz han naeuz: “Ngoenzneix baeg lai lo, maz cungj mbouj ndaej gwn, seizneix dungx iek lai, gwn caeuz gvaq caiq hawj mwngz.”

Doeklaeng gwn caeuz le, Daegcwngz cij menhnyednyed daj ndaw daeh biengj gaiq bakbit ndeu caeuq gaiq hajvaiz ndeu okdaeuj, song fwngz ndenq hawj bouxcawj. Bouxcawj hozndat dangqmaz, fok naeuz: “Gou hawj mwngz bae cawx bak duz bit caeuq 5 duz vaiz, mwngz dauq cawx gaiq bak duzbit caeuq gaiq hajvaiz hawj gou na?” Daegcwngz dap naeuz: “Deng ha, bouxcawj, neix mbouj dwg bak duzbit, nanzdauh dwg bak duzgaeq na? Neix mbouj dwg haj

duzvaiz, nanzdauh dwg haj duzma na?”

Coenz vah saek ndaej bouxcawj mbouj rox baenzlawz han lo, de raen ceng mbouj gvaq, cij ndaej nyaenx-heiq ndwi lo.

Bouxcawj vaih neix dangyienz mbouj nyienh couh baenzneix cuengq gvaq Daegcwngz.

Doeklaeng miz ngoenz ndeu, de youh naemj daengz aen banhlap ndeu daeuj doiqfouq Daegcwngz. De heuh Daegcwngz ma daengz gyang hongh, vix geij aen gang caeuq Daegcwngz naeuz: “Daegcwngz, ngoenzneix mwngz couh aeu aen gang hung neix bae daeb aen gang iq haenx, hawj de daeb haeuj ndaw gang iq bae. Danghnaeuz mwngz guh mbouj baenz, mwngz couh mbouj ndaej ngaenzhong!” Bouxcawj ndaw-sim caeg riu, de nyinhnaeuz baezneix ndaej baenz, couh ndaej mbaet gij ngaenzhong Daegcwngz roengzdaeuj lo.

Daegcwngz mbouj guhsing, maz cungj mbouj gangj, de byaij daengz

baihnaej aen gang hung bae, mbaet caw mbat baez dub, aen gang hung neix dek soiq bae, yienzhaeuh dawz gij vax soiq gang hung cuengq roengz ndaw gang iq bae.

Bouxcawj doeksaet caez, sim’ in aen gang hung bonjfaenh deng soiq, gipmuengz buet gvaqbae hut: “Aiya, Daegcwngz, mwngz baenzlawz dub aen gang hung gou vaih bae ne? De youh mbouj nyex mwngz gvaq!”

Daegcwngz soengsetset naeuz: “Mbouj dub de vaih, baenzlawz ndaej dawz aen gang hung bae daeb haeuj ndaw gang iq? Bouxcawj, mwngz guh hawj gou yawjyawj! Danghnaeuz mwngz guh ndaej baenz, gou mboujdan mbouj aeu ngaenzhong caemhcaiq gou lij boiz gij cienz hawj mwngz bae cawx aen gang hung moq dem!”

Bouxcawj baez nyi, bakaj ngoengngoeng, gik ndaej muenh gvaqbae lo.

(Vangz Bwnjli gangj Ouh Caijfangh cingjeix)



Lajmbanj Gig Gyaendei

□ Vangz Gveiyangh / 黄桂香

Daengngoenz ok, dujva hai,
Gaeqboux haenoo.
Doenghnaz loeg, raemxdah ngeuj,
Haetromh hoengheiq ndei.
Daengngoenz doek, ronghndwen mbin,
Lajmbanj hoenzngeungeu.
Gaeq haeuj riengh, roeg dauq rongz,
Ranzmbanj gig gyaendei.



Byabwzdi Bingznanz Gveigangj.

Sez Gyanghbok ingj

“Bang mwngz guh di saeh iq suenq maz ne? Mwngz yawjsiuj gou lo.”

Lungz Byauh aeu fwngz uet hanh gwnz naj, hanh lae haeuj ndaw bop fajfwngz de, miz di in, de nyaenx mbouj ndaej dawz daengz henz bak boq le geij baez.

“Baenzlawz yiengh lo? Fwngz mwngz——”

Siu Cuh byaij gvaqdaeuj, yawj-raen bop gwnz fwngz Lungz Byauh, saeknaj baez bienq, gig sim’ in.

“Mbouj youqgaenj.” Lungz Byauh riunyumj, yo fwngz daengz baihlaeng bae.

“Caen hojlieniz, itdingh dwg gaem gaenzcax roengzrengz gvaqbouh lo……”

•Sawcuenhraez Lwngnyez•

Gij Golwgnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

Siu Cuh gig sim’ in muengh Lungz Byauh, loq hozndat, nyaeuq bwnda, ndiengq gokbak, yawj ndaej ok de youh gyo’mbaiq youh gvan-sim Lungz Byauh.

“Aen song aen bop suenq maz?” Lungz Byauh roxnynih Siu Cuh nai de caeuq goq de, hawj de vuenheij fouzbeij, faj fwngz de lumj mbouj in lo.

“Ndei, seizneix mbouj aeu bang gou lo.” Siu Cuh ragrag gengoenh de,

“Daeuj, raeuz daengz laj faex hung yietnaiq bae.”

Go faex hung baihlaj sangjsetset, miz raq rumz ci gvaqdaeuj, Lungz Byauh roxnynih daengx ndang cwxcaih, go nywj ndaek rin dangqnaj, baenzlai ndeigyaez.

Siu Cuh riu aen doengjfaex iq cang gijgwn daeuj, biengj hai fa, ndenq hawj de.

“Dungx iek luba? Hawj mwngz

gwn!”

“Gou mbouj iek.” Lungz Byauh iet fwngz doi, “Mwngz gag gwn ba.”

“Mwnh, gijgwn miz haujlai ne.”

Lungz Byauh yawjyawj ndaw doengjfaex, cang ndaej rimrad dah-raix, beij ngoenzlwenz lai boix ndeu, lij lai miz song aen faengx dem.

“Mbouj!” De vanzlij doi, “Mbouj siengj gwn.”

(caengz sat)